

Poštovani,

ovim putem Vas obavještavamo da je pravnosnažnim rješenjem Instituta za intelektualno vlasništvo Bosne i Hercegovine broj UP-03-47-2-222/24MM od dana 07.08.2024. godine Udruženju „Glamočki krompir“, sa sjedištem u Glamoču, ul. Ive Lole Ribara bb, priznato ime porijekla „Glamočki krompir“ za krompir koji potiče sa područja Opštine Glamoč i koji je upisan u registar geografskih oznaka i imena porijekla sa danom 07.08.2024. godine. Sve činjenice su objavljene u Službenom glasniku BiH.

Udruženje raspolaže informacijama i relevantnim dokazima (fotografije, izjave kupaca i drugo), da pojedina privredna društva, preduzetnici i fizička lica prilikom distribucije, prepakivanja i prodaje „Glamočkog krompira“, namjerno ili iz nehata u svojim poslovnim objektima/privatnim objektima, isti miješaju sa krompirom koji ima drugu oznaku geografskog porijekla ili je uopšte nema, čime se kupci dovode u zabludu da kupuju zaštićeni „Glamočki krompir“, a ustvari kupuju krompir koji nema specifične karakteristike zaštićenog „Glamočkog krompira“. Time postupaju protivno Članu 55. stav 1. tačka b), c) i d) Zakona o zaštiti oznaka geografskog porijekla BiH („Službeni glasnik BiH“, broj:53/10, u daljem tekstu ZZOGP BiH).

Udruženje „Glamočki Krompir“ je prilikom zaštite proizvoda kod referentnih laboratorija izvršilo potrebne hemijske i biološke analize sadržine „Glamočkog krompira“, koji kao takav sadrži određene specifične karakteristike (količina skroba, celuloze, vode i drugo), koji su **differentia specifica (specifična razlika)** u odnosu na krompir sa drugih područja. Veoma lako se može utvrditi, a na osnovu hemijske analize, da krompir koji se prodaje pod lažnom oznakom „Glamočki krompir“ ima specifična svojstva krompira sa drugih područja (npr. Rogatički krompir, Egipatski i slično) ili obratno.

Članom 55. stav 1. tačka b) ZZOGP BiH propisano je sljedeće:

Nije dopušteno korištenje registrovanog imena porijekla ili geografske oznake u sljedećim slučajevima:

b) bilo koje korištenje za označavanje proizvoda čiju su kvalitet, reputacija ili neka druga karakteristika lošiji od onoga što je upisano u registar u pogledu imena porijekla ili geografske oznake,

c) bilo koje korištenje za označavanje proizvoda koji nisu obuhvaćeni registracijom, ali koji su iste vrste kao proizvodi obuhvaćeni registracijom,

d) bilo koje korištenje lažnog ili prevarnog obavještenja u pogledu geografskog porijekla, prirode i kvaliteta proizvoda na pakovanju, propagandnom materijalu ili drugim dokumentima tako da ostavlja utisak postojanja veze između proizvoda i zaštićenog geografskog naziva.

S tim u vezi kod nadležnih tržišnih inspekcija pokrenuli smo postupke inspeksijskog nadzora, a u cilju da se navedenim pravnim i fizičkim licima, zakonski zabrani da krše zaštićenu oznaku geografskog porijekla „Glamočki krompir“ i da istu zloupotrebljavaju.

Udruženje „Glamočki krompir“ će nezavisno od ishoda postupka kod nadležnih inspekcija, pokrenuti parnične postupke kod sudova, a radi zaštite oznake i naknade materijalne štete u smislu člana 71. stav 1. ZZOGP BiH.

S poštovanjem,
Udruženje „Glamočki krompir“